

T5412/4454(6)

CHINESE - JAPANESE LIBRARY

HARVARD - YENCHING INSTITUTE

AT HARVARD UNIVERSITY

OCT 10 1952



正法云云
字必方山

苑浴集卷之七

明長蘆都轉



司運使進階

嘉議大夫

劉公墓表

正德初聞代之陽有劉鐵漢者公也秉猷持憲直躬逆時獲罪罹奸濱死無悔幸而人謀効義天神協靈得再生焉當是時也群官擅權瑾尤肆虐願指為

皇制聲動即天章喜愠回生死呼吸撼乾坤干心忤意則汗渚宮墻希旨承顏則金紫嗣世迫脅海內燠煽朝廷文章之士牙籤錦軸頌德者盈几介曹

之夫首功汗級呈勳者填門比當大賀之時適瑾
有私家之慶公卿百執事高呼舞蹈於丹陛者十
惟八九而稽首崩角於瑾前者則濟濟罔缺焉是
何時也公何人也而與之抗昔東漢黨錮之禍如
爐如鑊孔褒以投主爭死皇甫規以無名耻生千
載壯之皆成仁取義之志公無愧焉嗚呼可以表
其墓矣丙寅公總理遼東糧儲兼屯種瑾初擅權
一急于貪或告瑾曰文官富有惟邊郎耳瑾明言
指意而公弗從瑾怒械至京師枷號示衆時枷重
法嚴晝夜監守雖親友莫敢近他枷者多十日餘

即死獨公枷月餘不死時公同郡王沉庵者以死
侍側日夕不離公曰我死其職分也如君何王終
不去方枷時有黃冠者至公邸遺家人藥丸曰日
剝一分服之盡則難脫是日公夢仙人自霄而下
以一丸藥納之口覺而口尚有藥香監守者俱言
見老人送藥忽不見於是喧聞九市上達朝堂而
西麓張太宰乘此異言之瑾得釋為民後太宰又
言宜起用以示公道遂授監察御史未幾而瑾敗
朝野稱為鐵漢云若夫公幼而悟長而又持已之
行正家之教範鄉之義莅官之政所當書者不具

書而獨取公處死生大節彰彰於時者為世楷法
云公諱繹字以成號斗山姓劉氏山西太原府代
州西關人也登成化丁未費宏榜進士初授戶部
主事歷郎中改監察御史陞河南衛輝府知府陞
長蘆都轉運鹽使司運使進階嘉議大夫云

公墓表

九川公飲恨而卒其友朝邑韓苑洛發其隱掖其
大及取名士潘子高之論痛哭流涕長太息表其
墓曰書曰善降祥又曰天難諶公關中即俊即宅

九川云云頂括字

汝傲也

之賢也懷安攘之志抱忠亮之節蘊貞懿之學秉
廉介之操中遭震撼放遺終身道遠而位促光已
輝而弗續志士至今傷之公之撫遼陽也清屯田
裁冗役嚴號令禁奸宄按豪雄料丁力將築邊墉
以遏虜寇一二渠兇魁罪懼將必當大法惑眾倡
亂而公危矣初公以左布政起復入京故事必先
補原職而後徐遷之先相以公國士也不可以常
調拘陞副都御史巡撫遼東及變上近貴先相故
大怨誤以公為先相與因欲罪之憲使者又不為
公申有詔收繫公詔獄使者至遼陽諸兇并使者

卷七
答辱之林侍郎廷昂奉

勅勘公事諸兇閉之憲使者出帑金大賚乃啓門且
撫慰諸兇謂公必重坐蓋圖悅諸兇心隱其械詔
使窘侍郎弗以聞而公果重坐遠戍憲使者以平
定論功超遷矣公平生建立如何而枉罹橫尤若
此祥邪非邪天邪果難諶邪然公議無泯時士林
扼腕嘆息位雖禡而名弗損身雖屈而道則亨後
公之嗣子光于科甲顯于庠序繩繩未艾擠公者
今安在也天難諶邪非邪公今已矣倚於史冊罪
也功也是邪非邪嗚呼可以徵矣吾友潘子高曰

正德間閹宦武夫相繼盜弄國柄生殺予奪頤指
氣使當其時勢摧威劫中外風靡士大夫依阿忍
泆以保身全妻子鮮有能自立者公于時明目張
膽數侃侃論天下事不置儲保治諸疏讀之凜凜
使人毛髮竦立疾風勁草狂瀾砥柱公之謂與大
同數逆而失處諸鎮効尤焉為政者徃徃務為姑
息不敢下一令伸一法遂使狂狡之卒裒兇鞠頑
待釁而動養患貽戚至于今未已也公以身任其
事務改絃而更張之天若厭禍公得大行其道豈
惟遼左永清即大同諸鎮亦當警懼知有

朝廷矣乃志未就而變即作獨使公一人當之豈非
天哉語有曰非常之元黎民懼焉及臻厥成天下
宴如也人徒見公受禍之慘而未覩宴如之効乃
併大同諸鎮事置不講藩鎮之鑒其不遠也已有
志于天下者其無忽諸此乃公之隱而且大者也
吾恐後世莫察其情焉故表而出之公之子南京
刑部郎中顥再拜泣血登之石若公之詳載之誌
銘不具書公諱經字道夫號九川姓呂氏陝西慶
陽府寧州人也起家進士授禮科給事中歷吏科
都給事中調山西蒲州同知詔起陞山東布政司

左叅政歷按察使左右布政陞都察院右副都御
史公生于成化丙申十二月初八日卒于嘉靖甲
辰十一月十五日享年六十九歲云

○明國子生西河趙子墓表

西河子諱瓘字汝完姓趙氏別號西河諸友以其
周於文學呼爲西河子關內馮翊之朝邑大慶關
人也未弱冠入爲縣附學生以朱子詩累應秋試
補廩膳甫五年

朝廷用輔臣議令天下郡縣選懷才抱德之士充歲
貢西河子應例上春官遊國學歷部事天官考勤

籍入仕版選期已屆而西河子卒矣其師尚書韓苑洛表其墓曰聖賢豈匏瓜哉傳說之版築膠鬲之魚鹽何其屑屑也古之人惟求得其本心初不拘於形迹生民之業無問崇卑無必清濁介在義利之間耳庠序之中誦習之際寧無義利之分耶市廛之上貨殖之際寧無義利之分耶非法無言也非法無行也隱于干祿藉以沽名是誦習之際利在其中矣非其義也非其道也一介不以與人一介不以取人是貨殖之際義在其中矣利義之別亦心而已矣西河子之鄉萬餘家皆習商賈苦

艱于息不益西河子笑曰何若是之艱哉吾聞之苑師曰馬援微時人不知名乃自表其能千金散而復積世有無用之儒者哉不數年起家數千金而人莫窺其所自也西河子文章典雅楷書深入顏室持已荏接人恭信而無偽默而寡辭若拘迂之士而其通敏闊畧又如此可謂達矣孔子曰賜也達於從政乎何有漢司馬遷氏作史記述貨殖詳子貢事而深崇之是非喻于利也存魯之業在是矣使西河子得郡邑而治之庶魯之業豈多讓哉顧止于是而已矣豈不深可惜哉其子遂勒之

石邃雖不事典籍居喪如禮哀痛若弗能盡者西
河子可謂不死云

○明贈中大夫光祿寺卿馬公墓表

公諱貴字尚賓以字行號靖川姓馬氏三原丁村
人也正統癸亥公沒弘治甲子家宰端毅王公表
其墓嘉靖癸巳以孫谿田子貴推恩贈官

皇帝若曰處士貴光祿卿理之祖父也篤孝友于家
庭化良善于里黨優游不仕人稱靖節之風授受
有徒世仰河汾之化其贈中大夫光祿寺卿理者
谿田子也谿田子思所以昭

皇恩光先德也故再表其墓以文命予曾祖仕祿服
田求志祖彥真努力絕人能舉牛馬逾垣度險徙
居王村元亂避兵淳化山中卒全其家洪武四年
天下大定乃返王村村人盡死於兵廬室盡燬乃
徙丁村云祖妣徐孺人太原同知睦嚴先生女也
父仲良仁讓謹飭口不言人過失與人交久而敬
之處鄉里犯而不校嘗有野鴿群集所居廬若忘
機者將卒出未命一編皆篤厚親故鄰里之說子
孫至今珍存云妣傅孺人生公予讀馬氏家史而
知谿田子所以大也夫湍不急則淵不深畜不極

則發不輝光馬氏自仕祿以來論篤可欲代爲善人及公則日新克實益弘世德使當時置之廊廟之間加之蒸民之上其施爲建立豈不道光富有哉乃竟抑而莫伸隱沒岩穴乃今谿田子興焉急而淵畜而發孰謂非公所不盡哉請詳論公世而表其墓公幼而靈俊徐孺人教之學乃日夜誦讀太原遺書即能曉識大意家貧弗能時具紙筆常以荻畫地學書及長友同邑杜知府棠張教諭顯石處士彥華高處士銘切磋講輔考尋載籍上稽天文下測地里中極人事然未有指歸也一日徐

孺人語之曰吾聞之爾太原外府君道在中庸不必旁求也公悟遂專意中庸師處士敏深于中庸者也又相與研極中庸之理公南居丁村處士北居巷村間有石橋每相過講有遺論送各期于橋則止一夕自巷村歸論難不已不覺其曙也忽見行人過始別去鄉人因曰分襟橋久之於六籍兩間無弗見中庸而日以自學舉以教人者皆中庸也吉士解栖霞嘗就問退而嘆服贈公詩有公生質類顏淵之句一時學子大夫皆尊信之公于中庸蓋手舞足蹈矣求樂中詔舉隱遺有司以公應

詔不就公能用周易六壬皇極諸書占事知來皆奇
驗事親孝父病藥不即功乃割股肉和羹以進疾
遂愈時杜知府師處士皆親喪廬墓人稱三孝子
云公生于洪武二十七年甲戌卒于正統八年癸
亥年五十預知卒期語門人曰某日日入時大風
吾歸矣果如期卒葬于丁村之幙頭田杜知府所
相地也門弟子服心喪歲時拜掃其墓涇陽周銘
者過墓必拜告所如還反面公所著有語錄一卷
周易雜占一卷中庸講義一卷配張淑人古有巨
言探數原者鬼忌泄天機者神嫉由漢以來京翼

李郭之流皆能察兆知先洞照今古禎祥妖孽毛
髮莫逃然卒不能白有其身嚴君平邵堯夫蓋能
將之以德則鬼神之道自我出矣如公者方且慶
延嗣世綿綿無窮豈特身安而德尊也哉御史大
夫何栢齋謂當與君平堯夫同傳信矣予又謂中
庸之旨原誠明于天道致精一于人心其極至于
位天地育萬物公能升其堂而窺其大焉雖與程
朱之徒同傳亦可也益見谿田子之興源流深長
矣

○明奉政大夫承天府同知許公墓表

公弘治甲子舉人歷任承天府同知卒于官父拙庵翁與我先君同登成化戊戌進士公又我省試同年蓋世好也乃爲之表其墓公諱世昌字順德號東崖姓許氏陝之澄城人拙庵翁諱英歷官至刑部郎中母楊太宜人公幼孤鮮兄弟伯叔既長勵志勤學比登鄉試尤日孳孳屢試南宮竟不第以太宜人老謁選吏部授太和知縣迎母就養知縣七年太和大治爲諸邑最都院使院使奏書旌之章凡五上省平章行御史臺諸司下檄獎之者三十二于是拙庵翁贈奉議大夫楊太宜人亦獲

封嘉靖乙酉轉開封府判捕盜不朞年地方寧謐院使又旌之丁亥陞順慶府同知起程日沐父老渡道拜送抵順慶適廣安賊勢猖獗殺官快攻城甚急公領民兵直抵廣安圍乃解蜀穀不熟而廣安饑尤甚死散者甚衆公夙夜圖賑救之策賴以活者千計民之種及牛具公告于當道給種買牛而荒蕪闢矣府素苦水城屢崩民且歲苦修役院使者召公圖之乃開渠西山以泄水而患息院使大加稱重命立石紀其功委署涪州小河一帶盜賊蜂起公奉檄勦平都院使設太平宴以勞之且

上其功賞白金二十兩公念太宜人年高蜀道險
遠不能迎養懇疏陳情終養及太宜人病公奉湯
藥夜不解衣及卒哀毀踰禮三年不越戶限服既
闋且皇皇然如新喪復除承天府公益勵清操盡
心職務

車駕南巡公適署府事百責艱大夙夜奔勞至于昏
斃復蘇者幾時又改修陵寢開築城池建立觀廟
添設司衛皆取辦于府兩院使方列牘共薦而公
因勞邁疾不起矣兩院使諸司憫公廉貧卒于王
事各給傳騎送抵家公生于成化戊戌三月十五

日卒于嘉靖庚子四月三十日享年六十三歲公
姿容秀整沉毅敏達強學修行衆方以大科顯仕
望之及入仕前後旌獎幾四十章而竟止于是是
固南宮失選銓曹論格也而其享年亦竟止下壽
天亦不可恃與謂之何哉

○○明提督操江南京後軍都督府都督僉事陳
公墓表

正德甲戌余以按察僉事巡兩浙公正位浙閩蓋
始識公別公二十年而公卒又十五年余參贊南
京機務公孫府學生應龍來問表蓋公治命也公

謹重周詳內機智而外溫醇與人交夷險通塞不
易其初蓋士大夫多好公而公亦聲稱籍甚官至
樞府榮封三世云公諱璿字汝玉號思古浙江湖
州府安吉之荆溪鄉人高祖諱興洪武初嘗授百
戶没于陣曾祖諱翼蓋白溝功陞都督同知祖諱
文襲金吾右衛指揮同知改温州衛正統間蓋平
鄧寇功陞浙江都司都指揮僉事父諱綱襲指揮
同知貌偉才達人謂可繼白溝之爵乃年強仕即
殞歿成化丁未公嗣職年甫十七也掌衛事蓋十
八年而溫衛稱振舉弘治甲子以都指揮體統行

事總浙江糧運乙丑

武皇繼統推

恩授署都指揮僉事丁卯總理屯局庚午揚州等處
備倭寇衛有缺官俸鈔及歲入魚利向泣事者蓋
多入私家公盡籍為公費又查革冒濫軍糧歲計
蓋四千八百餘石壬申流賊猖獗公為統帥時武
弁多濫及無告者為功次有邏卒誤獲防守卒六
人喜報公立辯釋之癸酉推浙江都司軍政掌印
丁丑實授都指揮僉事蓋錄孝豐湯毛九功己卯
充叅將協同漕運尋有宸濠之變奉

勅符旗牌關防不妨運事鎮蘇松常鎮四府地方公
既受命查革冗濫歲省軍儲蓋萬五百餘石復查
局不事事者當之罪初公領部檄調集兵馬聽候
迎

駕及是宸濠就擒

上受賀班師大燕公與焉有文幣白金牌花之賜太
倉鎮海嘉興三衛軍餘四百名貼守金山衛蔡廟
港崇明所軍人五百名防守潭子港皆支行糧然
潭子港已坍入江軍猶影射支糧蔡廟港附近衛
城公皆議革罷每歲省糧蓋三千五百四十石嘉

靖壬午推南京大教場坐營丁亥改團營果敢營
坐營尋奉

勅充叅將通州駐劄驗給官銀兼修河道省車脚餘
銀蓋二十四萬有奇解戶部發太倉收貯陞俸一
級兼賜文幣辛卯陞授署都督僉事南京後府僉
書壬辰奉

勅不妨府事提督操江兼理巡捕公以江防重務舊
無符驗關防不便行事疏請允給推

恩實授都督僉事追贈祖父如其官甲午春三月公
卒賜葬于永嘉宋萬山之原祭一壇云

○○明叔祖考武清縣知縣墓表

越惟成化之末中幸持權汪直梁昉威勢傾宇內
寵貴震朝廷公卿長跪稽首奉命唯謹頡頏振瑾
雖末銳而下不論也畿邑武清軍屯皇庄徧四境
最稱難治我叔祖美髯豐面身長玉立動止儼雅
器度莊偉天官卿簡畀而尹之時昉牧馬斯地爲
害百端叔祖不爲應付昉怒縛里正懸高杆以示
之曰知縣豈不見此叔祖乃擒昉頭自者亦杆而
懸之曰釋里正則釋頭自矣昉不得已釋之昉至
京言叔祖不稱武清遂罷歸自是杜門不出縣尹

以禮致之不能子堂叔繼宗適應里正役尹故苦
里正以爲叔祖必可致乃曰彼縣官自苦里正於
我何預焉竟不見後尹愧悔言之分守車平章平
章曰尹差矣致賢豈以威力執率尹踵門請數次
始一見示初我先君兄子也生而孤表伯李公貞
姊子也少失母叔祖躬撫教之先君登進士貞亦
中鄉試先君諱紹宗官至按察司副使封中憲大
夫贈通議大夫右副都御史云叔祖性介直執義
蹈矩動以禮檢見子姪亦具大衣庶幾可謂幽獨
無愧影衾言不妄發色不假人見世之多文飾者

則以為詐云近世評品人物類以庸敏為高下歷
觀前古興衰撥亂類非脂韋智巧之人所能堪叔
祖惻惻諤諤終於放逸夫豈有所不足哉大學謂
家齊而後國治我叔祖藏居田里成教於家我先
君表伯孤哀無告者也皆至成立今我韓氏聯翩
科甲衣冠濟濟皆我叔祖之餘也使其授之以政
作人之效豈不至于大行哉顧泯泯而沒世莫得
而述焉漢之張綱李膺豈不能翊贊皇猷澤潤生
民直方之不能行從古皆然也即其所至家人威
如之吉矣惟晉五允升上合豈不難哉豈不難哉

叔祖諱倫字秉彝天順七年以蔡沉書鄉試中式
云

○明裕菴處士曹縣紀君墓表

頂板

紀氏之先田不滿三百畝及處士之身有田三千
粟萬石金千斤曹稱大家惟紀氏處士曰吾苟富
矣夫富務施不施則人怨富務與不與則力孤富
務恭不恭則眾嫉人怨眾嫉力孤而且富禍之媒
也家之索也將如富何經曰富而禮天祐之吾將
祈天焉於是積義儲以資婚喪建瓜室以待疾病
禮途屢以濟行旅而懷之者多上交官府貴人下

結州閭豪傑而翼之者衆內修宗族外禮鄉賓而
愛之者溥懷多則譽發矣翼衆則勢順矣愛溥則
行達矣處士曰吾徃利矣是歲也麥兩穗葉兩爪
牛兩犢馬兩駒而財貨倍入焉於是處士曰吾修
之人而得之天矣行弗可怠也福弗可恃也乃修
堰張河葺青華開元二寺焚負券賑窮乏捐數百
緡焉壬申之變流賊劉七入于曹圍處士不忍害
惟求名馬處士弗與或曰賊勢淫矣郡縣且不能
支也君族危在旦夕柰何惜馬哉處士曰賊干紀
而命旺夫助賊殺人非仁也資馬爲亂非法也旺

則焉敢賊怒焚其居君子曰吾以處士惠人也乃
知義矣處士諱旺字恭明別號裕菴山東曹縣人
也生于永樂十七年正月二十八日卒于正德八
年七月十二日享年七十四歲朝邑縣丞子年書
之石以表公墓

○明文林郎四川道監察御史嚴君墓表

嘉靖己酉十一月十九日君卒于京邸既歸葬越
明年十二月君弟殿試天祐請表其墓先是君抵
予書曰疾勢留連啓候緣踈予以爲無藥恙耳訃
聞悲嘆累日夫造化之不齊將安問也以君所負

頂板字

應止于是耶嗚呼傷哉君諱天祥字叔善號雙洲
姓嚴氏吾關內馮翊之朝邑望仙觀人也嚴氏之
先唐嚴思善之後世居長卷之西原思善初諱誤
後以字行或曰唐有梓人節度使嚴譔賊私狼籍
得罪誅而節度從祖震又封馮翊郡王史氏重思
善厚德避譔嫌稱以字思善有大節善推占武后
時來周峻法思善獨尚寬平全活者甚衆來周疾
之謫交趾後稍遷至著作佐郎兼太史令官至禮
部侍郎子向爲鳳翔尹今西原有思善墓祠云向
曾孫諱威遷望仙觀父諱堯黼母李孺人君生而

靈異穎悟過人八歲能熟誦大學論語即通大義
邑侯郤君循良吏也素重人才見君大加奇賞厚
遺之十二入縣學受學於叔父堯黻君講習經書
至忘寢食而堯黻君又俊乂士也君盡得其學堯
黻君又以渭北趙水州之賢命君從之遊是夜水
州有奇夢焉歲試兩魁諸生僉憲開州劉君珂有
精鑒得君卷曰嚴生國士也於是遠近無不推先
嚴生者本僉憲賞識之力也庚子中陝西鄉試第
六刻經義爲多士程甲辰登秦鳴雷榜進士觀政
刑部授絳縣知縣期年而絳治人知向化野無盜

賊案無停積獄幾空虛有兇犯毆傷人股致死者
累檢傷股人骨無他君取二股骨察其形色長短
新舊不同大訊之兇犯具服蓋吏忤受兇犯賄潛
以他人枯骨易之寡母告子不孝君廉得母與僧
姦狀憐而釋之亦不治母曰子母之際難言也撫
按有疑獄輒以付君惟明克允君之治絳也不以
刑罰為威而以廉故不苛而豪滑畏不以賑費為
惠而以靖故不擾而民衆懷不以戒令為期而以
信故不勞而庶績熙而君又敏達勤慎故並其有
土厥鄰環三晉而郡縣者七十餘絳縣治行第一

撫按共聞于

朝戊申徵拜四川道試監察御史明年實授未幾疾
作彌留卒迺君生于正德甲戌某月某日至卒得
年三十有六君性孝友五六歲時每遇美果食必
先奉母既長朝夕惟以承歡父母為念母病泣跪
進食呼天而禱父落一齒持之泣累日嘗因事諫
父父怒以履踏其面笑而受之父乃感悟天祐多
病飲食湯藥必親嘗之學每有所得必以語天祐
居鄉謙謹重法禮鄉人愛之及為御史遺書家人
曰凡居鄉必順天理合人情毋挾勢凌物利已損

人常以天字安在眉頭行無不利矣初絳平陽富
邑君三年間俸薪外分毫無取去絳時僚屬士民
爭以進饋皆不受曰取予士人之大節豈以在絳
去絳而遷其守乎昔兩漢取士以孝廉為首成周
效邦君養恬為先夷視君履居身之珍治絳之美
兩無所歎云

〇〇 明清軒處士富平紀公墓表

公諱鶴字霄鶴號清軒言鶴唳清也世為西安富
平蓋村里人沒已久矣曾孫道將於嘉靖十八年
十一月初三日舉二代之喪而葬焉道予門墻士

頂松寫

也請表其墓昔三代盛時雖無用下及兩漢猶
存一二庶叔度以家僕存主孤遂舉民牧治行稱
平民安頌作傳列青史名垂千古藝何有焉近代
專較文藝是故篤行之士泯沒遁世矣聞公事親
孝養生送死罔不以禮哭母終而喪明勤父疾而
傷生其處兄弟之間尤為恭友析產自取其薄饒
沃歸於兄弟撫育族孤有室成業至于捐粟以濟
歲凶煮粥以活餓殍則又行義施於鄉黨者也若
公者得不謂之篤行之士哉俾寄之百里之命即
無赫奕之聲其視世之取高科司郡邑貪黷肆賊

機械巧中誘惡傾善欺上毒下蕩然無復廉恥者
遠矣然竟泯沒遁世焉公生于正統元年三月初
三日卒於成化二十年八月初四日得年四十有
九配趙孺人子男一女一孫男四曾孫男八女八
玄孫男七女四公惠人也身儕於齊民壽甫過五
十人謂天道亦無知矣今觀公狀子子孫孫繩繩
衆多間有聞人孰謂天道果無知哉

○○明堂弟縣學生韓汝聰墓表

華木千葉者多不實靈駒千里者多難牧天地有
十憾造化靡齊人亦莫得而詰也痛哉吾汝聰弟多

頂林宮

才而位弗偶資秀而嗣弗續且不以中壽已矣嗚
呼痛哉汝聰諱邦達字汝聰陝之西安朝邑之南
陽人也我韓氏本慶陽府安化縣人宋元以來世
以武貴至元中葉以金牌萬戶鎮蒲關關今隸朝
邑又數世卜壠於邑南馬坊頭規模宏碩松栢十
數種種皆百株壠外供祭田百畝吳彥常者世佃
其田取租每歲清明辦牲品餘租供族之生員後
稍稍為田隣侵而吳亦陰賣之正德中乃計見田
三十七畝與彥常姪雄為符書供租如故事初洪
武初髯祖者始罷武階為齊民亡入洛南縣家史

失其名但相傳髯祖云後念朝邑壠在焉携長子
平輔祖歸朝邑留餘子於洛南今其族亦甚繁盛
云又四世至祖顯奉政大夫刑部郎中贈通議大
夫都察院右副都御史配張淑人初封太安人繼
封太宜人贈淑人旌表節婦生伯父珏義官伯母
白孺人生汝聰少穎敏姿容先中憲府君愛之
取為子以蔡沉書補縣學廩膳生後伯父以余光
第四人俱登名仕版伯父八子獨汝聰乃復取回
子之初汝聰赴同州歲試伯父偶得暴疾急召汝
聰歸已易簣不能言汝聰號哭討食所出跪吮伯

父喉中痰出乃張目一視曰汝歸矣遂卒汝聰謙
讓能忍納交時豪門多長者車轍然嚴毅有智畧
人多畏而不敢犯里中有爭皆赴愬多不之官一
判則人不敢再辭再辭則傾財助直者必令勝白
孺人之喪遠近督徠無弗吊送者宗人以為吾韓
氏駕海之梁云生于弘治庚戌七月十七日卒于
嘉靖甲辰八月初七日享年五十四歲先以嘉靖
二十三年十一月二十五日葬于新阡縣南西原
之上因畧擬其世系行實梗槩表其墓云

○○明故蒲城雷公墓表

公既卒介一行人既自為誌納諸幽壙矣嘉靖
壬寅介一卒孫縣學生洵溥予門墻友也將葬介
一請文以表公墓公諱太初字本仁姓雷氏世為
陝之西安蒲城人今

聖天子龍飛改元誕恩公以壽官公幼淳謹以孝忠
聞讀書僅能紀家務性狷介寡合故異趨者頗不
悅而同道者則愛重之慎取與畏法義見非分之
物必懼焉若浼成化初西邊用兵官府給金購糴
寬限以召商人爭趨之公獨不領金衆曰值高限
遠奇貨可居也奈何弗取公不答逾年徵糴以年

之稔也倍其數且輸之邊死徙者殆百家後部糧
甘肅衆以官值易布糞規厚利公獨齎本色同行
者笑其拙抵肅而兵殷用急部使者比杖日且二
三四邊一時不能貿易有司督併妻子捶楚無完
膚至破家以償一日昧爽偕同里數人適野途中
偶坐者見來疑其捕已也不暇取所携走見遺金
一袋衆競分之公獨不取且曰異哉亡金客見諸
君分金而弗顧恐有他故且非分之物得之不祥
越月監司獲盜諸分金者皆為盜指誣而被劫家
又皆識其為家金也竟無以自白斃於獄正德中

縣侯劉東岡大謨以御史謫循良尹也以公負鄉望辟為鄉飲宿不就劉親身至其第卒亦不赴劉甚高之平生凡與鄉人論談每以力田教子守分為先家政外則課子讀書泊然靜處而已公生于正統六年辛酉閏十一月二十六日卒于嘉靖十三年甲午六月初四日享年九十有四子兩所謂介一也正德甲戌舉進士為行人司副以縣令致仕朱子曰求利未得而害已隨之惟仁義則未嘗不利也公不領糴金不買官金不分遺金人皆嗤其愚也卒之衆皆亡身破家而公獨安樂焉信利

義之相去遠矣因詳書以表公墓為世之貪利而不思害者之鑑云

○明贈文林郎河津縣知縣逸恬樊公墓表

公歿且二十有六年矣子得仁以監察御史擢四川行省叅知政事將表其墓以文問予予觀樊氏世德知樊氏之必興也予追交公公精神秀爽資性聰敏心意豁如也田園廬室苟合苟完不戚戚以求美不妬勝不曲徇苟志同情適暢飲終日若遺棄生事者得仁則剛毅而通達浚明而仁厚久要不忘有古人風尹河津按直隸民懷士頌聲望

卓然故觀公則知今日有得仁觀得仁則知樊氏
之大將不止今日矣公諱勛字功甫號逸恬馮翊
朝邑之北石村人也以得仁為河津時贈文林郎
河津縣知縣父清齋公為榮縣典史時川蜀盜起
清齋公部餉松茂病甚公代領卒事為諸郡邑先
榮尹下堂迎勞上官以詩對旌之會清齋公入
覲至湯陰寒病不汗公解衣溫抱如是三日猶不汗
且不食夜夢老翁曰是病得艾愈乃迎艾醫分痛
灸病果愈其事母嚴王楊繼母望仙楊皆以孝聞
公雖不卒學然曉識大義初成化乙巳歲大饑清

齋公欲公以列入監公辭曰一子侍養典章也以
才自貴顯者尚乞歸況以粟易官為邪且迎伯父
義及諸從兄弟就食於榮又樊朗者伯父遺腹子
也清齋公撫至成立畀之婚室田業公亦體父志
友愛之冬月鄉人有寒者公解衣衣之其人請計
值後償公曰勛賣衣者邪配楊孺人亦以得仁官
封云

○明四川瀘州吏目屈君墓表

君諱泰字道隆姓屈氏本楚公族也漢高帝徙齊
楚豪傑於關中遂為華陰人世居義合里祖諱韶

縣學生入太學祭酒司馬公詢合六館試之每魁
多士謁選吏部授山西隰州同知有仁政祖妣李
孺人考諱弘仁以君兄都御史西溪先生官刑部
時封員外郎天性淳雅言行不苟曰朱子我師也
吾大者弗能乃弗能遵小學耶楷書迺勁類歐陽
詢仗義輕財愛人謙已鄉人式焉妣李宜人亦以
西溪先生贈君生八月而李宜人卒育于李孺人
同知公既守廉不苟取比謝事歸又適成化乙巳
之荒西溪先生已爲學生君力田供養父兄弗暇
業儒稍裕則長矣就吏一考嘆曰吾家世以儒而

吾以胥史何爲者哉不赴調縣尹謁同知公勸之
進後授河南永城縣典史署縣事時西溪先生督
撫淮揚縣里正懼君依勢爲威多歛銀麥餽之君
皆叱却正曰各里循故事具白金爲節儀弗容進
一人僞言叅稟入于堂擲金於地疾馳去君追還
付之流賊倡獞撫司發銀千兩爲軍需君與暢進
吏者方易其半賊至城陷盡焚之吏謀曰旣焚無
稽餘銀五百若通纂入完案誰則知之君厲色曰
國家多難又因以爲利即子孫乞於市亦不爲此
縣有國戚二張素橫遠近趨媚君獨弗禮家衆大

不平欲辱之一人曰渠西人素剛安肯甘受則損
威多事矣幸庵彭公總制河南知君檄供事軍門
屢獲功賞總制凱還論功奏陞四川瀘州吏目
欽賞白金段疋羊酒瀘蜀大郡也憲司治焉民俗好
訟憲司有難決事輒下君後巡撫大臣行瀘稅多
欠下君典徵事民素畏君皆完六筴某收侵數千
石君庶實其懼懷二百金求免君不聽竟置於理
時營建宮室採大木千餘章巡撫及採木司空選
能幹官解木君與焉水手解戶千餘人往返日費
總萬餘咸君主支無纖毫不明瀘之分界居民倚

兩郡影射尤習刁悍官亦弗能禁君嘗位槐牙鎮
鎮分界處也有鬻民立公側言詞悖慢問之曰富
順民也究之寔瀘民百餘人持械詈譟至君呈兵
司治以法自是無梗民矣庚辰春思封公年高致
仕歸家居十餘年安分自律非公事不入城廓君
居官十年餘里居十年餘業業謹篤如一日可謂
難得也已公生于成化三年十一月初四日卒于
嘉靖十二年五月二十九日享年六十有七瀘士
吳子莫曰屈南衙不好士人獨與子莫善因飲從
容叩之南衙曰泰行素為士人輕動曰胥史也泰

仰之若天日及泰遊歷四方見官于郡縣者貪殘
巧中教奸詆善發財黷貨動以萬計民有一怨言
立亡身破家剝民之脂膏以媚權貴賢人君子無
如我何者自計凌之以張已威類皆士人也泰又
心疑之子莫不覺擊几長嘆曰若此者視南衙取
與不苟強禦不畏也奚啻溷廁哉君子縣學生徵
請以表其墓

○明湖廣高竅巡檢司巡檢贈文林郎山西襄
陵縣知縣尚公墓表

正德丙子六月十八日公卒塋淺土越三十餘年

頂松書

嘉靖辛亥二月二十六日公子主事君薰等葬公
于縣東高原祖塋之左朝邑韓苑洛表其墓曰比
條之水有長河西合於崑崙東分爲九河九曲圜
乎華夷北之水惟河爲大也南條之水有長江上
連乎洞庭下會于彭蠡一水限乎南北南之水惟
江爲大也人見河之大則仰思星宿之海人見江
之大則仰思岷陽之泉納漢沔受蘭窟萬流奔趨
溯流而源汪洋澎湃可知矣使河非星海則行潦
耳將朝盈而夕涸使江非岷泉則雨漶耳將秋澤
而春乾安能其大若是乎傳以顯揚爲孝之大者

江

非以其子之賢可以蓋前人之過愆非以其子之
貴可以榮前人之封號潛德幽行前人冥冥之仁
因是而可徵也古之仁三公奕世楊氏放雀之仁
著矣九卿顯名于氏治獄之仁著矣公雖歿矣公
之嗣子若蘭若薰若芳聯翩仕籍而薰以進士爲
部屬芳以鄉舉爲縣令二君才名濟濟異日崇階
大拜未可量也非公陰德之隆可以致是夫陰者
人不得而知也若顯德著聞或以名彰或以位貴
或以祿富身積其德身受其報非陰也必蓄德盈
缶泯然無聞於終世然後不盡之福衍及後人而

前之善始著焉公位不過下士祿不過代耕名不
過見知於閭里使非二君亦墻野蕭然一荒塚耳
故觀公者當觀於崑崙九河洞庭彭蠡以溯於星
宿之海岷陽之泉可也若公居官而守官箴居鄉
而篤鄉誼居家而肅家政如狀之所列人之所知
者特沈潛旣道灘汭支流耳不足以盡公也易曰
積善之家必有余慶蓋以子孫之慶歸前人之善
焉公諱達字伯通姓尚氏關內西安之武功人以
掾士授山東青州府永阜倉大使改授義河馬房
草廠大使改授湖廣高竅鎮巡檢司巡檢以薰囊

陵縣知縣三年考績贈公如其官生于正統乙丑
六月初五日卒于正德丙子七月十八日享年七
十二歲云

○大明大中大夫陝西布政司右叅政北澗王
公墓表

公道富而施不既職舉而位不究行修而人不知
中遭毀阻放逸沒世寒泉弗汲君子心惻焉於是
尚書韓苑洛表其墓曰夫登山者不必至其巔但
峯巒翠抱有花有竹有松有栢可憐可亭即勝地
也涉泉者不必至其源但豬匯清深有荷有菱有

頌

商
沁
清

下
亭

蝦有魚可舟可釣即佳境也登仕版者位無崇卑
克宅為賢職無小大就列為稱公始稽鈔關經監
允運會計稱當習蠱盡剔督理邊餉出納惟允芻
糧充足三軍感悅當其特節鎮大臣至與之謫確
邊機謀議撫政而元戎叅佐莫不稱嘆敬服其浚
明亮采溢於常職之外又如此此其主事員外郎
中舉職于部屬者也自郎中進叅議分守關西開
司平涼平涼多宗室且驕橫凌轢官府侵虐小
民公均祿糧以治其本根刑撥置以剪其羽翼姻
眷比附者連坐以法由是豪強斂跡官民不擾胡

店有劇寇大肆劫掠公擒其渠魁釋其脅從地方以寧撫臣上其事

天子嘉其功金幣羊酒均錫焉由叅議進副使振揚風紀一道澄清乃承祖母之重繼接祖父之喪哭奠殯窆必誠必信虞祔祥禫一遵古禮起復河南尋進叅政整理驛傳關內稱平而公罷歸矣此其歷藩臬而舉職于外臺者也使其進節鎮陟卿相則其贊襄陳力豈不如今日哉彼負重而棟橈實美而鼎折一縲之外失足則墮百泓之中逼視則陷又惡用登蓮華之峯問崑崙之西哉夫鈔關監

允皆貨利之所藩叅臬副皆顯要之官至於大同邊郎羨餘每巨萬而開中招買之利動輒不貲公始終冰玉自持無毫髮誣染又常以士庶女潔一虧終玷訓其諸弟姪則其自處可知矣而當道以簞簋不飭論罷公官夫瓠巴鼓瑟至感流魚奏之王門誰爲之聽故卞氏之璧徒抱泣于中野而已士之見知古今爲難人不知公豈足異哉雖然方田王公之狀南澗楊公之誌歷歷可述漁石唐公謂之中流砥柱異時觀風者采之布之天下傳之後世孰謂人果不知公哉昔貞晦先生沒世而名

不稱唐儒申之曰天至高而卑聽鬼神至幽而明
聽天知之鬼神知之何謂名不稱哉嘗聞之水深
而波易動木高而風易搖方田謂公方正自持不
習諂媚是故有以招之矣然合抱之良蛟龍之生
胡損焉公姓王氏諱納言字允忠號北澗山東淄
川人正德丁丑進士孤時思時錫登之石

○大明文林郎長壽縣知縣贈承德郎工部虞
衡清吏司主事趙先生墓表

先生卒且三十餘年矣嘉靖壬子子永州太守渭
北公粵若稽古撰述懿行請吾友四川行省少平

頂格字

章渭野樊子為之狀參贊尚書苑洛韓子童時習
知先生素履狀又實錄也于是表其墓曰士君子
胸懷脫落而無所閉藏資性淳懿而恥為機械制
行坦夷而不為隱怪此居身昌後之道希賢進德
之基也今觀樊平章所述疊疊千餘言凡先生生
而家士而庠出而官處而鄉平考無遺大率若此
所謂脫落淳懿坦夷者皆先生之所長閉藏機械
隱怪皆先生之所恥也世固有雄才宏畧談笑以
揮天下之事而曾藏險陂又其有高視闊步問學
自修托跡于孔孟而內實荏汚人見其飾功揚名

登榮陟顯或者峻視于先生而不知皆先生之罪
人也先生以是而孝于親以是而友于兄弟以是
而尊賢取友以是而敦本崇實立教于延津以是
而省刑薄斂敷治于長壽以是而周貧濟急敦睦
于鄉閭是故父母安之兄弟友之朋友與之學日
光大教日弘敷民日感懷鄉閭敬而慕之矣以先
生之實則雖有服大僚可也乃位不過郎官名不
過鄉士人謂善無徵也而渭北公通達明敏強學
飭躬服先王之教益弘其業登名鄉試賜第黃甲
官部屬終郡守宦跡所至卓有令聞而先生以渭

北公官工部時贈承德郎虞衡清吏司主事然後
士君子之報始伸而先生之心慰矣先生諱龍字
虞臣已酉鄉試中式授河南延津縣教諭陞四川
長壽縣知縣配仇安人渭北公諱儒字席珍號渭
北云

卷七

